

四庫全書

子部

欽定四庫全書

子部

同姓名錄卷五

詳校官中書臣孫球

主事臣祁韻士覆勘

覆校官中書臣汪學金

校對官原任典簿臣郭祚熾

謄錄監生臣金國禮

欽定四庫全書

同姓名錄卷五

明 余寅 撰

渾沌二

天皇伏羲氏策辭云皇命渾沌居降龍之位惟主於民
五帝紀云帝鴻氏有不才子渾沌掩義隱賊好行凶
慝賈逵註曰帝鴻黃帝也蓋一為天皇之臣一為地
皇之子是二渾沌也若莊子所稱中央之帝曰混沌
不必實有其人且渾混沌字稍異不得入錄

風后二

一黃帝六相之首見帝王世紀

一嘗與夏禹問答見玄女戰經

扁鵲三

一軒轅時人見黃帝八十一難序一與趙簡子同時簡子疾扁鵲入視知其與百神遊於鈞天三日必寤見史記一與秦武王同時武王示之病扁鵲請除左右沮之扁鵲怒而投其石見國策

按軒轅在太古而秦武與趙簡相去二百餘年三扁鵲固有徵大抵軒轅時人善醫後二人倣而名之耳第在趙者姓秦名越人扁鵲其號則謂止二扁鵲亦可

張若二

南華經云黃帝將見大隗於具茨之山張若謂朋前馬昆閼滑稽後車至於襄城之野又蜀紀云秦張若為蜀郡太守與張儀共築成都城史記昭襄王三十年

蜀守若伐取巫郡及江南為黔中郡是也

吳回二

帝嚳時重黎為火正帝使誅共工氏而不盡乃以庚寅日誅重黎以其弟吳回為重黎後復居火正至漢又有吳回乃長沙文王吳芮之孫嗣封為長沙哀王

夸父二

海外北經云夸父不量力與日逐走逮之於禺谷道渴而死棄其杖化為鄧林大荒東經云蚩尤伐黃帝帝

命應龍殺蚩尤與夸父

余考夸父凡兩見一與日競而渴死一與帝競而殺
死其人其事固自不同或疑其為一人者非

龍二

一見軒轅政典命為東正洛分爵祿賢智

一見尚書舜典命作納言夙夜出納惟允

左師觸龍二

說苑夏桀貴為天子富有四海不修禹政荒淫于樂沈

酗于酒其臣左師觸龍諂諛不止湯放桀併誅觸龍
史記趙孝成王元年秦伐趙拔三城求救於齊齊欲得
長安君為質太后不肯左師觸龍入諫長安君出質
齊發兵往救秦將解去

商容二

尚書武成篇云式商容閭註商容殷之賢人又高士傳
商容不知何許人為老子師容有疾老子求遺教容
張口曰吾舌存乎曰存曰吾齒存乎曰亡知之乎曰

非謂其剛亡而弱存乎容曰嘻天下事盡矣

或謂老子多壽其師安知非即武王所式者是疑老子與武王同時也余閱唐宗室世系表彤德曾孫碩宗周康王賜采邑於苦縣五世孫乾乾生耳周平王時為太史夫六世祖在康王時則六世孫自合生平王時平王去武王遠矣老子安得師武王所式者邪余故斷其必非一人

伊尹二

後周伊靈代人善騎射為文王所知嘗謂之曰若伊尹
阿衡於殷致主堯舜卿既姓伊庶幾不替前緒遂賜
名尹歷衛將軍隆州刺史盧奴縣公見北史伊婁穆
傳

孫陽二

莊子疏云伯樂姓孫名陽字伯樂過虞坂有騏驎伏鹽
車見伯樂而長鳴伯樂下車泣之王莽傳地理侯孫
陽造井田使民棄工業左將軍公孫祿請誅之以慰

天下

田和二

周安王十三年齊田和會魏侯楚人衛人于濁澤求為
諸侯宋田和陝州人畫師李成意韻深遠筆墨精簡
見圖繪寶鑑

蕭大心二

周蕭大心宋人平南宮長萬有功封為附庸宣公十二
年為楚所滅見左傳地譜世系

梁蕭大心簡文第二子封尋陽王為雲麾將軍江州刺史

田布二

周威烈王十七年田布殺其大夫公孫絲公孫絲以廩丘叛於趙田布圍廩丘戰于龍澤見竹書紀年

唐田布田弘正之子國家討淮蔡布率偏師前後十八戰皆有功官御史大夫河陽節度使父子俱擁旄節並著忠勤

趙同趙嬰齊各二

晉趙同趙嬰齊皆原大夫趙衰之子靈公被弑司寇屠岸賈治賊以致趙盾遂與諸將攻趙氏於下宮殺同與嬰齊等滅其族

漢南越王趙佗之孫嬰齊武帝時嘗入宿衛後十餘歲其父胡薨嬰齊請歸嗣立為南越王

晉流人王如叛率衆五萬進逼襄陽征南山簡使將軍趙同率師擊之經年不能尅智力竝屈嬰城自守

慶舍二

齊慶舍相國慶封之子慶封已殺崔杼益驕令慶舍用政田鮑高樂氏發甲圍慶封宮盧蒲癸以戈擊慶舍解其左肩猶以俎壺投殺人而後死

趙孝成王八年趙將樂乘慶舍攻秦信梁軍破之悼襄王五年慶舍將東陽河外師守河梁

宋兩蘭子

一以舞劍千元君元君召使見其技立賜金帛一以燕

戲于元君元君大怒拘而擬戮經月乃放庸齋子曰
二人俱以技于君一偶喜而賞之一偶怒而罪之技
同而所遭異時不可必也見列子

智果二

晉智果智伯之族知智伯必滅別族於太史為輔氏見
國語隋永欣寺僧智果會稽人工書煬帝甚善之嘗
謂智永曰和尚得右軍之肉智果得其骨見書斷
二人之名千古適符而一以慮禍別族一以斬福出

家俱不終於本宗

荆軻二

博物志云荆軻字欣非渡河蛟夾船欣非不奏斷其頭而風波靜除淮南子云荆欣非得寶劍渡江中流兩蛟繞船欣非赴江刺蛟荆爵為執圭孔子聞之曰夫善除腐肉朽骨棄劍者欣非之謂乎觀此二書則荆欣非與孔子同時且係楚人而燕太子丹所使刺秦王者是衛人考其時前後距二百五十餘年其為兩

荆軻奚疑

柳莊三

春秋柳莊衛大夫獻公稱為社稷臣與邑裘氏與縣潘氏

陳柳莊高宗柳皇后從祖弟清警有識鑒太建末為太子洗馬終於度支尚書

隋柳莊河東人少有器識博覽墳典濟陽蔡大寶有重名於江左見莊歎曰襄陽冰鏡復在於茲文帝踐祚

進開府儀同給事黃門侍郎

孔嘉二

宋瑒公立十年十一戰民不堪命孔父嘉為司馬宋督
為太宰因民之怨宣言司馬則然已殺孔父而弑瑒
公注孔氏父字嘉名孔子六世祖

後漢孔嘉武都太守孔奮之子城門校尉作左氏說
士燮二

晉士燮士會之子為上軍佐從卻克敗齊師于鞏

吳士變廣信人事孫權為衛將軍封龍編侯

公子慶忌二

吳王闔閭既殺王僚又憂公子慶忌之在鄰國恐合諸侯報讐乃使要離如衛刺殺之見吳越春秋又哀公二十年公子慶忌驟諫吳子弗聽遂適楚聞越將伐吳請歸平越欲除不忠者以說于越吳人殺之見左傳

鄭國二

魯鄭國字子徒受業孔門見仲尼弟子列傳

韓鄭國故韓水工韓欲罷秦令國間說秦鑿涇水三百餘里以溉田中作而覺國言渠成亦秦之利卒使就渠溉田四萬餘頃秦以富彊因命曰鄭國渠見河渠書

介子推二

史記云晉文公復國賞從亡者介子推不言祿祿亦不及說苑云介子推年十五為荆相仲尼聞之使弟子

往視焉還曰庭下有二十五進士堂上有二十五老人

劉摯二

左傳昭公十三年晉人將尋盟齊人不可晉人使叔向告劉獻公曰抑齊人不盟若之何對曰盟以底信君苟有信諸侯不貳何患焉注云獻公名摯

宋劉摯東光人元祐中尚書右僕射遭鄭雍之謗貶團練副使新州安置性峭直有氣節觸機輒發不為威

怵持心少恕勇於去惡竟為朋讒奇中

楚兩莊蹻

韓非子云莊王欲伐越杜子諫曰莊蹻為盜於境內而吏不能禁此政之亂也蹻蓋莊王時人矣又漢西南夷傳莊蹻者楚莊王苗裔也威王時使將兵略巴黔中以西數千里定屬楚欲歸報會秦擊奪楚巴黔中郡道塞不通迺以其眾王滇

按楚世家莊王與威王相去二百五十年其為兩莊

躋無惑也

韓起二

晉韓宣子名起昭公二年晉侯使宣子來聘觀書於太史氏見易象與魯春秋曰周禮盡在魯矣

魏明帝太和中吳主孫權遣使立公孫淵為燕王淵命將軍韓起誘致其使斬首三百餘級以所假印綬符策首級來獻

孔忠三

魯孔忠字子蔑孔子兄孟皮之子見史記仲尼弟子列傳漢孔忠孔子第九代孫長沙太守子襄之子年五十七見孔子世家吳孔忠孫皓牙將晉王渾伐吳遣參軍陳慎擊破之

公子牟二

中山公子牟身在江海之上心居魏闕之下見南華經魏公子牟游於秦謂應侯曰臣且有効於君夫貴不與富期而富至富不與驕奢期而驕奢至驕奢不與死

亡期而死亡至累世坐此者多矣應侯曰善見國策
國策註云莊子所稱中山者不與應侯同時

齊兩司馬穰苴

一在景公時用晏嬰薦為將卻燕晉之兵盡取所亡故
境尊為大司馬見史記

一在閔王時用為執政閔王殺之大臣不親燕舉兵使
昌國君將而擊之齊軍破閔王奔莒見國策

夫景公與閔王相去九世穰苴定非一人乃吳師道

註國策謂穰苴實嘗為閔王卻燕晉而戰國雜記妄
以為景公時事故太史公誤引入傳中耳果如師道
言則史記所云晏嬰之薦引景公之寵任皆謬傳妄
臆之說矣太史公必不然假令太史公註國策又當
辨穰苴為景公時人而證師道之註之非總之二公
各是其是各非其非皆不忖有同姓名之說耳余故
斷其必為兩人

趙成二

晉五卿趙成中行吳魏舒范鞅知盈皆三軍將佐位在韓起之下又秦二世責趙高以盜賊事高懼陰與其弟成謀更立公子嬰

春秋兩士句

范獻子之父宣子為晉國上卿

士景伯之父文伯為晉國卿士

左傳地譜世系云伯瑕文伯士句士弱之子與宣子

同族同名

晉兩咎犯

史記秦送公子重耳至河咎犯請辭重耳曰所不與子
犯共者河伯視之乃投璧河中以與子犯盟

說苑晉平公多其賦斂下治城郭國人憂之咎犯進隱
語平公稱善遂與咎犯參治國

按前咎犯卒於襄公時而平公又在靈公之後是晉
實有兩咎犯故得並錄

莊賈二

齊景公命田穰苴將兵扞燕晉之師穰苴願得寵臣為
監軍景公使莊賈往穰苴約旦日日中會軍門賈至
夕而後至遂斬以徇三軍皆振慄

秦二世時陳王軍破其御莊賈殺以降秦陳王故將軍
呂臣為倉頭軍起新陽攻陳殺賈復以陳為楚

韓簡二

左傳僖公十五年秦伯伐晉晉侯逆秦師使韓簡視師
復曰師少於我鬪士倍我註云簡晉大夫韓萬之孫

唐韓簡韓允忠之子乾符初節度觀察留後累加檢校
右僕射封昌黎郡王

公孫敖三

左傳文公元年王使內史叔服來會葬公孫敖聞其能
相也見其二子焉叔服曰穀也食子難也收子穀也
豐下必有後於魯國齊公孫敖莊公嬖臣以勇力聞
從如崔氏公被弑敖死之漢公孫敖義渠人武帝時
以校尉從大將軍擊匈奴獲王封合騎侯坐妻為巫

蠱族

孔奐二

左傳襄公二十七年秋七月陳大夫孔奐與曹許之大夫皆至以藩為軍

陳武帝永定三年除孔奐為晉陵太守前後二千石多行侵暴奐清白自守妻子並不之官惟以單舸臨郡所得秩俸隨即分贍孤寡郡中號曰神君

肩吾二俱見莊子

一見田方篇嘗問孫叔敖為令尹

一見逍遙篇自稱聞大言於接輿

按叔敖與接輿相距一百十餘年足徵肩吾非一人

尹文二

南華經云不累於俗不飾於物不苟於人不忤於衆古之道術有在於是者尹文聞其風而說之作為華山之冠以自表接萬物以別宥為始

後涼呂纂既嗣偽位大司馬番禾公呂弘自以功名崇

重恐不為纂所容乃以東苑之兵作亂刳尹文為謀
主見呂纂傳

王果三

南華經云彭陽遊於楚見王果曰夫子何不譚我於王
王果曰我不若公閱休

唐王果為雅州刺史經江中望巖腹有棺欲墮緣厓視
其碑曰欲墮不墮遇王果五百年後來葬我果曰前
知我姓名吾合葬之因遷葬焉見神怪錄

宋王果饒陽人舉明法為審刑院詳議官歷知永寧軍
權秦鳳路兵馬總管

陳寅二

左傳定公六年秋八月宋樂祁使晉祁告其宰陳寅寅
曰子必立後而行吾室亦不亡乃見溷而行

宋紹定初陳寅知西和州極邊重地寅義不辭難誓其
守城北兵數十萬圍攻甚急寅晝夜苦戰援兵不至
城陷伏劍妻子賓客同死者三十一人

景差二

說苑云景差相鄭鄭人有冬涉水者出而脛寒景差見之覆以上衽晉叔向聞之曰吾聞良吏居之三月而溝渠修十月而津梁成六畜且不濡足而况人乎

史記云楚有宋玉景差之徒皆好辭而以賦見稱然皆祖屈原之從容辭令終莫敢直諫其後楚日以削數十年竟為秦所滅

兩景差一鄭人一楚人鄭人與叔向同時是春秋之

未而楚人在屈原之後是戰國之末其相去遠甚是
二人也

楚兩公子申

一其王時為右司馬多受小國之賂以偁子重子辛楚
人殺之故春秋書曰楚殺其大夫公子申

一字子西惠王時為令尹哀公六年秋七月楚子在城
父將救陳卜戰不吉命公子申為王不可則命公子
啟五辭而後許白公作亂殺子西

趙周二 趙伯魯二

趙趙周襄子兄伯魯之子伯魯蚤死襄子封周為代成
君見趙世家

漢趙周楚太傅夷吾之子夷吾死事景帝封周為商陵
侯見功臣表

宋有趙伯魯燕王德昭裔孫見宗室世系表與襄子
之兄伯魯同

司馬尚三

趙幽繆王七年秦人來攻王命大將李牧將軍司馬尚
將兵擊之李牧誅司馬尚免趙忽顏聚代之軍破以
王遷降

晉兩司馬尚 一惠帝之孫永康元年封襄陽王

一司州刺史李矩為石勒所攻率衆南走衆皆道亡惟
裨將司馬尚等百餘人棄家送矩至於魯陽見李矩
傳

孔謙二

戰國孔謙字子慎孔子七世孫嘗為魏相

後唐孔謙魏州人勤敏傾巧頗知錢穀之事晉梁相距河上大小百餘戰調發供饋未嘗闕乏所以成莊宗之業者謙力居多及為租庸使專事聚斂天下怨苦明宗詔斬洛陽市

杜摯二

秦衛鞅說孝公變法孝公稱善甘龍杜摯等弗然相與爭之公卒用鞅法

魏郎中令河東杜摯著文賦頗傳於世

郭開二

秦使王翦攻趙趙使大將軍李牧禦之秦多與趙王寵
臣郭開金為反間言李牧欲反遂捕牧斬之趙隨以
敗亡

晉陶稱為江夏相將軍郭開從稱往長沙赴喪稱疑開
附其兄弟乃反縛懸頭於帆檣仰而彈之鼓棹渡江
觀者莫不震駭見陶侃傳

趙禹三

戰國趙孝成王四年韓上黨守馮亭以上黨詐獻趙王
大喜召平原君與趙禹而告之禹等以為可受王遂
發兵取上黨與秦戰大敗於長平

西漢趙禹廉人武帝時以刀筆吏積勞至少府為人廉
倨舍無食客公卿相造請終不報謝務在絕知友孤
立行一意

宋青州民趙禹上書言趙元昊必反宰相以禹狂言從

建州元昊果反開封府司錄司事陳希亮言禹可賞不可罪仁宗釋禹賞為徐州推官見陳希亮傳

陳軫二

楚陳軫與張儀俱以游說事秦惠王皆貴重爭寵儀惡軫於惠王惠王終相張儀而軫奔楚

晉元帝時石勒寇新蔡害新蔡王確於南頓廣陵公陳軫懼率衆降于勒

張登二

戰國張登中山人中山君稱王齊欲與趙魏伐之中山
大恐謀諸登登以計紿齊而從趙魏以止其兵
梁張登義陽人累有戰功為當時驍將歷官衛尉卿太
子左衛率見張惠紹傳

薛譚二

博物志云薛譚學謳於秦青未窮青旨一日辭歸青餞
於郊衢撫節悲歌聲震林木響遏行雲譚乃謝青求
返終身不敢言歸又唐玄宗女常山公主下嫁駙馬

都尉薛譚見公主列傳

毛公二

一戰國處士藏於博徒嘗勸公子無忌歸救魏見信陵君傳

一前漢趙人治詩為河間獻王博士見儒林傳

戰國姚賈三

趙策趙使姚賈約韓魏時雖不可考其云趙使則趙臣也魏策周最入齊秦王怒令姚賈讓魏王是在秦武

魏襄時其云秦令則秦臣也秦策姚賈梁監門子則
魏人仕秦與始皇李斯竝時者是三姚賈矣國策吳
師道註云

羅尚二

戰國策羅尚見秦王曰秦四塞之險利於守不利於戰
又晉羅尚襄陽人善屬文為益州刺史性貪少斷蜀
人言曰尚之所愛非邪則佞尚之所憎非忠則正

黃齊三

國策或謂黃齊曰人皆謂公不善於富摯今王愛富摯而公不善是不臣也註黃齊楚人

宋兩黃齊 一臨桂人紹興進士調富川尉曹成寇起擒獲七十輩縣以安堵後知昌化軍具言桂林多俊秀且地脊民貧詔增貢額減軍輸邦人利之

一建安人登進士官至兵部侍郎丁蔡柄用齊非時不見於私第以顯謨閣待制出知通州

楊達二

秦甘茂宜陽之役楊達謂公孫顯曰請為公以五萬攻
西周得之是以九鼎抑甘茂也見國策

隋高祖族子楊達初為鄴鄭趙三州刺史上差品牧宰
達為第一擢工部尚書上開府弘厚有局度楊素稱
其有君子之貌兼有君子之心

戰國兩季梁

列子云楊朱之友曰季梁季梁得疾七日大漸其子環
泣謁三醫季梁厚貺遣之俄而疾自瘳

國策云魏王欲攻邯鄲李梁聞之中道而反往見魏王
言邯鄲不可伐

按楊朱與孟子同時是在魏惠王之世而國策所云
欲攻邯鄲者是惠王玄孫安釐王之事相距八十餘
年國策註云與列子所稱不同然哉

魯連二

齊孟嘗君有舍人而弗說欲逐之魯連謂孟嘗君曰物
舍其所長之其所短堯亦有所不及矣今使人而拙

則罷之不肖則棄之其人必相仇報孟嘗君曰善乃弗逐見國策

晉涼州刺史張軌有疾酒泉太守張鎮移檄廢之軌遣子實將兵討鎮鎮懼委罪於功曹魯連而斬之見前涼錄張丑二

楚威王戰勝於徐州欲逐嬰子於齊嬰子恐張丑謂楚王曰王之戰勝也盼子不用也今嬰子逐盼子必用復整其士卒必不便於王也楚王因弗逐見國策

晉後將軍郭默矯詔殺平南將軍劉楨輒領江州時太尉陶侃鎮荊州上表討默其將宗侯縛默父子及默將張丑詣侃降

陳莊二

秦惠文王起兵伐蜀取之蜀主更號為侯而使陳莊相蜀蜀既屬秦益強富厚輕諸侯見國策

陳後主第八子名莊封會稽王都督揚州諸軍揚州刺史容貌最陋性嚴酷左右不如意輒剗刺其面或加燒熱
司馬康三

國策云楚圍雍氏韓借救於秦秦使公孫昧入韓又命司馬康之郢

晉司馬康宗室通吉侯勲之子勲為征虜將軍領西戎校尉常懷據蜀之志及康為漢中太守遂擁衆入劍閣自稱成都王桓溫遣朱序討平之

宋司馬康文正公之子哲宗時為右正言勸帝及時向學且請太后禁中訓迪其言切至以居父喪寢地得腹疾且殆猶具疏所當言者以待曰得一見天子極

言而死無恨

王離三

秦兩王離 一始皇二十六年并天下乃撫東土至
於琅邪列侯武城侯王離列侯通武侯王賁等從與
議於海上 一二世時關東諸國皆自立叛秦二世
使王翦之孫王離北擊趙楚懷王命項羽救趙大破
之虜王離

或疑武城侯王離即王翦之孫余考王翦與子賁將

兵定六國在始皇時而其孫離至二世時始用為將
北擊趙則從始皇出狩者必非王翦之孫也且本紀
列從狩諸臣先王離而後王賁夫王賁即翦之孫離
之父先列其子而後其父當時左史何至舛戾乃爾
而太史公復因其謬而不改無是理也

蜀漢王離廣陵人以才幹顯為督軍從事後代何祗為
犍為太守治有美績雖聰敏不及祗而文采過之見
楊洪傳

石生二

秦始皇三十二年使石生與韓終等求僊人不死之藥
後趙石生石勒從子封河東王

呂臣四

秦二世時陳王敗走其御莊賈殺以降秦陳王故涓人
將軍呂臣為倉頭軍起新陽攻陳殺莊賈復以陳為
楚見陳涉傳

漢兩呂臣 一以舍人從起陳留以郎入漢破曹咎成

臯為都尉擊陳豨功封寧陵侯

一高帝功臣呂青之子孝惠四年嗣封陽信侯俱見
功臣侯表

晉泰始七年汶山守兵呂臣等殺其督將以判族滅之
見大同志

孫壽二

秦始皇兼六國稱皇帝李斯取藍田之玉為璽玉工孫
壽刻之為希世之寶

後漢孫壽中黃門孫程養子程以迎立順帝功封浮陽侯食邑萬戶程病臨終上書以國傳弟美帝許之而分其半封壽為浮陽侯

王綰二

秦始皇滅六國兼有天下與丞相王綰等議變封建為郡縣

南唐王綰事烈祖為虔州節度使見王興傳

李洪二

先秦李洪趙相李兌曾孫太子太傅

前燕李洪仕慕容氏為龍驤將軍進位司空以忠篤著

名

張賀二

秦二世時陳涉起斬張賀為將章邯進兵擊之陳王出
監戰軍破張賀死

漢張賀為掖庭令宣帝以皇曾孫收養掖庭賀撫循甚
密及帝即位賀已死封其子彭祖為陽都侯賜賀謚

陽都哀侯

胡武二

秦陳勝自立為王號為張楚以胡武為司過主司羣臣以苛察為忠勝信用之諸將以故不親附

後漢梁冀擅權凶縱太原胡武奏記三府薦海內高士而不詣冀冀怒勅捕誅武家死者六十餘人

王賁四

秦兩王賁一昭王時五國伐秦無功罷於成臯天下

爭事秦王賁韓佗之曹皆超而行事見國策

一將軍王翦之子始皇十八年將兵擊魏魏王降盡
定魏地

前蜀王賁王方慶之後從僖宗入蜀遂為成都人仕王
建為雅州刺史

金王賁第進士積官南京路按察使敦厚尚義不營產
業叱歿家甚窶上聞憫之厚恤其家

李曇三

秦李曇初仕趙封柏人侯入秦為御史大夫見唐世系表

漢李曇潁川人少孤事母至孝陳蕃等薦曇德行純備擢登三事必能宣贊盛美增光日月桓帝以安車立纁徵之不起

唐李曇宗室密王元曉曾孫嗣密王

田安二

齊田安故齊王建之孫下濟北數城引兵降項羽羽立

安為濟北王後為田榮所殺見田儋傳

梁武帝破齊出東昏妃潘玉兒玉兒有國色軍主田安
啟求為婦玉兒泣曰昔者見遇時主今豈下匹非類
死而後已義不受辱及見縊潔美如生見王茂傳

趙嬰二

秦始皇初兼天下出撫東土五大夫趙嬰從至琅邪

晉愍帝建興三年蘭池長趙嬰於青澗水中得玉璽光
照水外文曰皇帝行璽涼州刺史張寶遣使送京師

見前涼錄

公孫慶二

陳涉世家云秦嘉等聞陳王軍破出走乃立景駒為楚王引兵擊秦軍使公孫慶使齊約并力俱進齊王田儋惡楚不請而自立遂殺慶

漢太守公孫慶當祠章陵舊俗以衣冠子孫為御史時功曹白用宗正劉祖祖辭乃用左騎校尉薛丞丞周旋進退言出成謨大見敬重亦以祖為高歲盡俱舉

孝廉見風俗通

王襄四

魏王襄為魏王豹將兵守安邑及豹反漢王命曹參攻
安邑虜襄

西漢王襄宣帝時益州刺史欲宣風化於衆庶使王襄
作中和樂職宣布詩

宋兩王襄 一南陽人為西道都總管高宗即位金人
圍京師徵兵入援故迂道宿留降寧遠軍副使永州

安置

一鄧州人經術登科事孀嫂如母養孤甥如子教誨
後進調恤鄉里以學行稱詔表門閭賜號處士

繒賀二

鄭司城繒賀以鄭情賣秦秦襲鄭鄭伐秦敗秦兵於汪
見鄭世家

漢繒賀以連敖擊項籍卻楚迫騎戰彭城斬籍封和侯
見功臣表

程邈二

秦程邈下邳人始皇時得罪繫雲陽獄覃思十年易大
小篆為隸書三千字奏進始皇善之用為御史見字
源

唐程邈長於丹青以花鳥松石寫真為能見名畫錄
許章二

漢曹參攻破齊歷下軍定齊郡得故齊王田廣及其守
相許章

宋許章慶歷進士知建州轉屯田郎中為政治繁劇而不問苛細所至有聲

鄭昌二

項羽既自立為西楚霸王聞漢還定三秦并關中且東羽大怒迺以故吳令鄭昌為韓王以距漢又漢御史大夫鄭弘兄昌字次卿好學通法律為太原涿郡太守大著治迹

前漢兩張勝

一在高帝時奉燕王盧綰命使匈奴見盧綰傳

一在武帝時副中郎將蘇武使匈奴見蘇武傳

前漢兩陳嬰

一為楚柱國四歲屬漢定豫章浙江等郡封堂邑侯

一豪祖侯陳錯之子孝惠二年嗣封十九年薨謚曰懷

侯俱見功臣表

劉京二

西漢劉京文帝侍郎從邯鄲張君學道受餌雲母朱英

方服之壽百三十餘如二十許人能先知吉凶又能
為人祭天益命

東漢劉京光武子封琅邪王顯宗尤愛幸賞賜恩寵莫
與為比好修宮室窮極伎巧殿館壁帶皆飾以金銀
段宏二

漢段宏濮陽人景帝時事蓋侯王信信任宏官至九卿
見汲黯傳

晉太尉劉裕命子桂陽公義真都督諸軍鎮長安夏王

勃擊破之義真獨逃草間中兵參軍段宏追尋得之束義真於背單馬而歸

王駿二

漢宣帝時王駿初以孝廉為郎後代薛宣為御史大夫妻死不復娶或問之駿曰德非曾參子非華元亦何敢娶

新莽天鳳三年遣大使五威將王駿將戊巳校尉出西域諸國皆郊迎貢獻焉者詐降伏兵擊駿等皆死

甘公二

前漢甘公著通占天象歷星經二卷

後漢蒼梧太守甘公與陶謙同縣遇謙於途見其容貌異而呼之住車與語甚悅因許娶以女見魏志

張忠五

漢張忠陽朔二年為御史大夫見成帝紀

晉張忠中山人隱於泰山清虛服氣脩導養之法其居依崇巖幽谷弟子亦皆窟居五日一朝其教以形不

以言及歿賜諡安道先生

後魏張忠張讜之兄在南為合鄉令歸魏賜爵新昌侯
卒於新興太守

宋兩張忠俱開封人

一為澶州總管會河決商湖詔留戍滿卒以助隄役
輒羣譟為亂忠潛捕倡前者數人斬以徇

一資州刺史京東西路兵馬鈐轄儂智高反移英州
團練使將兵八千扼賊歸路忠謂其下曰我十年前

一健兒以戰功為團練使若曹勉之於是不介騎而
前手捉賊帥二人馬陷濘不能奮中標槍死

李延年二

漢李延年中山人武帝李夫人之兄初坐法腐給事狗
監及夫人得幸召貴延年延年善歌為變新聲弦
歌所造詩佩二千石印號協律都尉

唐李延年宗室徐王元禮玄孫嗣徐王員外洗馬

前漢兩蘇賢

一代郡太守蘇建之子以父任為郎稍遷騎都尉從祠河東后土官騎與黃門駙馬爭舩推墮駙馬河中溺死官騎亡詔賢逐捕不得惶恐飲藥死

一長安男子與京兆尹趙廣漢客有郤廣漢使尉史禹劾賢為騎士屯霸上不詣屯所乏軍興下有司覆治禹坐誣罔要斬見趙廣漢傳

陳武四

前漢陳武以將軍將卒救東阿至霸上擊齊歷下軍封

棘蒲侯

吳陳武松滋人從孫策渡江征討所向無前及權統事
專督五校進偏將軍從擊合肥戰死

後趙兩陳武 一黎陽人妻一產三男一女武攜其妻
子上書自陳石勒以為和氣所致賜乳婢一口穀百
石雜綵四十匹

一羌人育於臨水令陳君家陳君奇之議易其故字
武慕蘇武守節不服單于事遂名之曰武

劉寶五

前漢劉寶廣陵王胥之第三子封南利侯

後漢劉寶郭后所生沛王輔之子中元二年封沛侯

後魏劉寶洛陽人貲財巨萬最為富商海內之貨咸萃其庭車馬服飾擬於王者見洛陽伽藍記

晉劉寶高平人以徒罪役作扶風王司馬駿以五百疋贖之既而用為從事中郎當時以為美事見世說新語

宋劉寶岳武穆部將嘗破楊么有功及武穆遇害遂散其部曲隱居華容山

漢兩田廣

一齊王田榮之子榮死齊人立廣為王後為韓信所虜
一京兆人兄弟三人共議分財紫荆樹即枯死廣因悲
泣不復析樹樹應聲榮茂兄弟相感遂為孝門見陸
士衡豫章行詩註

楊敷三

漢楊敷楊喜之子孝文十二年嗣封赤泉侯

後周楊敷天和中為汾州刺史爵臨貞縣公

唐玄宗女齊國公主下嫁駙馬都尉楊敷

趙興三

前漢兩趙興 一南粵王趙佗五世孫元鼎初嗣立欲
內屬比諸侯為其相呂嘉所殺

一平帝時為上黨太守王莽殺司隸校尉鮑宣又欲
滅其子孫盡收寘獄興歎曰我受漢茅土不能立節

而鮑宣死之豈可害其子也勅縣盡出之

後漢趙興下邳人肅宗時為司隸校尉素不卹諱忌每入官舍輒更繕館宇移穿改築故犯妖禁而家人爵祿益熾

王延四

漢成帝時河堤大壞汎濫四州乃以校尉王延代領河堤謁者見十三州志

晉王延西河人九歲喪母泣血三年幾至滅性繼母卜

氏以蒲穰及敗麻衣延延事之彌謹卜氏嘗盛冬思
生魚延尋汾叩凌而哭忽有一魚長五尺踊出水上
延取以進母食之積日不盡於是感悟撫延如已生
隋王延為文帝子秦王俊官屬領親兵十餘年俊甚禮
之及俊疾延衣不解帶俊薨勺飲不入口及葬日號
慟而絕帝嗟異之特詔葬於墓側

梁王延長豐人好學善詩賦官至刑部尚書為人重然
諾與其弟規相友愛五代之際稱其家法焉

劉衍四

漢兩劉衍

一楚思王

一下邳惠王

宋兩劉衍

一宗澤部將建炎初澤留守京師命衍保

護河梁金將烏珠攻汴京僚屬入問計澤曰劉衍必
能禦敵乃選精銳數千使繞出敵後金人方與衍戰
伏兵起前後夾擊金人大敗

一龍溪人及第知潮陽歲大歉發縣帑傾家資以賑
民所全活甚衆改知新州秩滿詣京師議青苗不合

力乞致仕累辟不起

漢兩丁義

一以騎將從高帝入漢還定三秦破項籍封宣曲侯

一高帝功臣丁禮曾孫元鼎二年嗣封樂成侯

張純五

漢武帝遺詔以道書貯棺中後不知因何出在冢外時
張純為河東太守以此書呈宣帝

東漢兩張純 一光武時大中大夫使將潁川突騎安

集荊陽宿衛十餘年位至大司空封武始侯在朝歷
世明習故事建武禮儀多所正定

一靈帝時舉兵殺北平太守劉政等自稱彌天將軍
寇幽冀二州詔遣中郎將孟益討之大破於石門

吳張純吳郡人少厲操行學博才秀赤烏中拜郎中擢
太子輔義都尉孫權廢太子和純盡言極諫被幽死
宋張純張質之子衛尉寺丞

郭瓊二

漢郭瓊東郡人容貌陋劣意度過人每寄宿人家輒乞薪自照讀書不眠主人笥中有祕書瓊皆知之如悉覽然晝卧不閉目行地無蹤見洞冥記

宋郭瓊廬龍人為右領軍衛上將軍瓊雖起卒伍而尊禮儒士孜孜樂善蓋武臣之賢者也

韓說二

前漢韓說弓高侯韓頽當庶孫元鼎六年以待詔為橫海將軍擊東越有功封按道侯太初三年為光祿勳

掘蠱太子宮衛太子殺之

後漢韓說山陰人博通五經尤善圖緯舉孝廉與議郎
蔡邕友善數上封事言灾眚剋期果驗官至侍中江
夏太守

劉脩二

前漢劉脩宗室東平思王之孫元始元年封高樂侯

魏劉脩劉表之子官至東安太守著詩賦頌六篇見摯

虞文章志

田甲二

漢景帝時韓安國為梁孝王中大夫坐法抵罪蒙獄吏
田甲困辱之無何拜安國為梁內史甲肉袒就謝安
國卒善遇之

漢武帝時張湯為御史大夫與長安富賈田甲私交甲
雖賈人有賢操所以責湯行義有烈士之風

孔安國二

漢孔安國孔子十一世孫嘗師申公受詩又能言尚書

孔氏有古文尚書而安國以今文讀之武帝時為博士歷諫大夫臨淮太守

晉孔安國山陰人少孤貧以業儒顯孝武時為會稽內史領軍將軍隆安中以本官東海王師

何武二

漢何武成帝時為大司空封汜鄉侯平帝即位有詔舉可大司馬者王莽私從武求舉武不聽後數月太后竟用莽為大司馬莽風有司劾奏徵武自殺

唐何武壽州人嘗被誣枉至州投石自明守釋之未幾
寇起即請於守曰此真武畢命之秋也命領偏裨入
樅陽不意盜發叢翳間兵盡駭潰武獨鬪死

前漢兩劉更生

一楚元王玄孫宣帝時為諫大夫宗正給事中後改名
向

一齊孝王曾孫太始二年襲封牟平侯

許昌三

漢孝武建元二年相至侯許昌由太常為丞相班史謂
蹢蹢廉謹無所能發明後漢顯宗自為太子時親愛
其弟楚王英及即位數受賞賜特封英舅子許昌為
龍舒侯靈帝熹平元年會稽妖賊許昌起句章自稱
陽明皇帝扇動諸縣衆以萬數郡司馬孫堅召募精
勇千餘人討破之

召平二

一見蕭相國世家嘗為何晝自安之計者故秦東陵侯

秦破為布衣貧種瓜長安城東瓜美故世謂東陵瓜
一見齊王世家高后崩齊王發兵誅諸呂齊相召平聞
之發卒圍王宮中尉魏勃給平代將兵圍王平信之
勃遂圍相府平自殺

按索隱註廣陵人召平與東陵侯召平及齊相召平
別一人是有三召平矣余考揚州人物志廣陵人即
種瓜東陵侯初非有二安得列而為三

丁固二

漢高帝斬丁公徇於軍中曰人臣毋效丁公楚漢春秋
云丁公名固

吳孫皓寶鼎三年以御史大夫丁固為司徒初固為尚
書夢松樹生腹上謂人曰松字十八公也後十八歲
吾其為公乎至是果如其夢

衛玄二

漢衛玄成帝母衛姬之弟封關內侯

隋衛玄煬帝時領京兆內史鎮京師帝曰關右之任一

委於公賜玉麟符以代銅獸

劉昌二

漢劉昌宗室趙敬肅王彭祖次子封武始侯彭祖薨議
立後其所寵淖姬兄為武帝官者上召問對曰無咎
無譽上遣使立昌嗣彭祖

唐劉昌開封人德宗時以御史中丞攝濮州刺史值李
希烈陷汴州昌以三千人守寧陵希烈衆五萬陣于
城下昌擐甲胄躬勵士卒大破其衆

王陽二

前漢王陽琅邪人為益州刺史行部至邛郯九折阪歎
曰奉先人遺體奈何數乘此險即稱病去及王尊為
刺史至其阪問吏曰此非王陽所畏道邪吏對曰然
尊叱其馭曰驅之王陽為孝子王尊為忠臣

後趙王陽以驍騎領門臣祭酒石勒僭稱趙王以世子
弘鎮鄴勒曰今世非承平不可專事文業使陽教弘
以擊刺

張遵二

漢宣帝元康間烏孫王尚楚主解憂不與主和主置酒
使壯士拔劍擊之王傷馳去漢遣中郎將張遵持醫
藥治其疾

蜀漢張遵張翼德之孫官至尚書隨諸葛瞻於緜竹與
鄧艾戰死

李壽二

前漢李壽武帝時為新安令史戾太子敗亡藏匿泉鳩

里發覺圍捕太子自度不得脫入室自經壽趨抱解已無及後上傷太子乃下詔封壽為邳侯

後蜀李壽偽主李雄從弟初拜大將軍封建寧王及雄子期襲位壽率衆向成都矯太后令廢期而自立

陳咸三

前漢陳咸御史大夫萬年之子以父任為郎有異材萬年嘗病召咸教戒於牀下語至夜半咸睡頭觸屏風萬年大怒欲杖之咸叩頭謝曰具曉所言大要教咸

調也萬年迺不復言萬年死後擢御史中丞公卿以下皆敬憚之

新室陳咸沛郡人王莽初置六經祭酒各一人秩上卿咸為講禮祭酒

宋陳咸御史升卿次子開禧初轉運判官總蜀賦時僭亂後帑藏赤立咸商權利病規畫備至故軍興增支八千四百五十餘萬皆不取於民民賴以安

劉隱二

前漢劉隱宗室趙敬肅王玄孫元延三年嗣封王莽篡位貶為公明年廢

梁劉隱天祐二年拜廣州節度使開平初加檢校太尉兼中書令封南平王

張業二

西漢大司馬王根內懷姦邪欲箠朝政推親近吏主簿張業以為尚書敝上壅下司隸解光劾大不敬見外戚傳

東漢張業為郡門下掾送太守妻子還鄉里至河內遇劫盜業與賊戰死遂亡失屍骸見張武傳

賈充二

漢藝文志賈充著賦四篇晉賈充初仕魏為廷尉高貴鄉公之弑充實為之及武帝受禪行太子太保錄尚書事

趙玄三

漢成帝為定陶恭王置後少傳閔崇以為不當謝太傅

趙玄以為必當謝太子不從閭崇之議而趙玄緣是以左遷

秦姚泓被晉將劉裕征討主簿閭恢則謂定當戰將軍趙玄則謂決當守姚洸竟用閭恢之言而趙玄因是以戰歿

二趙同名猶曰偶然耳迺當時相與駁議者適俱姓閭此其偶符尤出意表

漢建平二年少府趙玄為御史大夫臨延登受策有大

聲如鐘鳴上問侍郎李尋尋對即洪範所謂鼓妖人君不聽為衆所惑則致此見五行志

李根三

漢李根許昌人年七百餘歲少壯自若見續僊傳

晉陶侃討蘇峻累戰無功監軍部將李根請立白石壘為滅賊之術侃從其謀夜脩曉訖賊見壘大驚

後燕李根襄平人仕慕容寶為中書監初寶在長安與根等讌以擣蒲為戲寶整容誓曰世言擣蒲有神若

富貴可期頻得三廬於是三擲盡廬寶拜而受賜故云五木之祥

宋建韓約各二

前漢倉公見齊王王后弟宋建知其要脅痛不可俛仰又不得小溲即為柔湯使服之而愈見倉公傳

後漢梁州義從宋建反詐降金城劫質從事韓約等隴西露布名約為賊購以千戶侯約改名遂見獻帝春秋

唐韓約為左金吾衛大將軍與李訓鄭注協謀誅宦官
被害

張就二

漢張就山陽人受韓詩於刺史栗豐後至大官徒衆甚
盛

魏張就父恭為燉煌長史適太守馬艾卒遣就詣太祖
請新守至酒泉為黃華所執却以白刃就終不回私
與父書促兵擠華恭遂進攻酒泉事平賜恭爵關內

侯就為金城太守

劉勝三

前漢劉勝景帝第九子中山靖王

後漢兩劉勝 一和帝長子少有痼疾延平元年封平

原王 一潁川人自蜀郡太守告歸鄉里閉門掃軌
無所干及當時服其清高

王閔二

前漢王閔平阿侯王譚之子哀帝時為中常侍帝尊寵

董賢置酒麒麟殿有法堯禪舜之語閎犯顏直諫上不悅遣閎出不得復侍宴

後漢王閎訕邯人為郡三老更始敗土人王調自稱樂浪太守光武遣王遵將兵擊之閎等殺調迎遵皆封為列侯閎獨讓爵帝奇而徵之道病卒

卜式二

一漢武帝時河南富人以輸財助邊錫通侯之賞
一魏武帝時河南術士以分形斷穀赴方技之招

後人見博物志

楊輔三

前漢楊輔初為京兆書佐後為御史丞素行陰賊好以
刀筆陷人於法見王尊傳

前秦楊輔苻堅時為左長史及苻丕嗣位以輔為尚書
右僕射濟陽公

宋楊輔遂寧人乾道進士以龍圖閣學士知建康府兼
江淮制置使

田蘭二

關中富商田蘭家業巨萬以末致財用本守之見史記
貨殖傳又晉宗室東嬴公騰鎮鄴搗并州將田蘭等
部衆萬餘人至鄴授蘭為鉅鹿太守東海王越召之
不至命李暉斬蘭降其衆見東海王越傳

魏豹二

漢魏豹故魏諸公子下魏二十餘城立為王與楚連和
為韓信所虜漢王命守滎陽周苛等殺之

後趙魏豹范陽人官至太山太守所在有治名豹嬖妾
先死後豹守廩丘而妾見形與豹言論翼日而卒見
十六國春秋

劉福三

前漢兩劉福

一宗室城陽共王第七子元朔四年封海常侯

一中山靖王玄孫元始元年襲封中山王

宋劉福下邳人為橫海指揮使以功授龍捷都虞候雄

州防禦使兼本州兵馬都部署

王龔二

前漢王龔以外屬為光祿勳與奉車都尉劉歆共校書
皆侍中白左氏春秋可立哀帝問諸儒皆不對乃出
龔為弘農太守見儒林傳

後漢王龔高平人永和元年官至太尉在位恭慎自非
公事不通州郡書記其所辟命皆海內長者

張猛五

前漢張猛張騫之孫有俊才元帝時光祿大夫給事中
大見信任恭顯憚之卒為所譖自殺

後漢張猛建安中為武威太守時酒泉太守張揖為郡
中彊族黃氏所殺郡人楊豐走武威投猛假豐都尉
使齎檄告酒泉為揖報讐見魏志閻溫傳

晉張猛會稽內史謝琰帳下督也琰討孫恩戰敗猛於
後斫琰馬琰墮地被害劉裕左里之捷生擒猛送琰
小子混混剗肝生食之

南涼張猛仕禿髮儁檀為殿中都尉儁檀與赫連勃勃
戰敗奔南山成七兒因叛據北城眾至數千猛諭眾
不宜從小人作不義事其下遂散追斬七兒

前秦張猛苻堅時為太史令建元九年天鼓鳴有彗星
出於尾箕猛言十年之後燕當滅秦後果如其言見
苻堅傳

李亨二

漢李亨茂陵少年好馳駿狗逐狡獸或以鷹鷂逐雉兔

皆為佳名狗則有脩毫釐睨白望青曹之名鷹則有青翅黃眸青冥金距之屬見西京雜記

唐肅宗初名嗣昇立為皇太子改名紹言事者云紹興宋太子名因改名亨


郭成四

漢郭成為輕騎校尉從大將軍衛青擊匈奴得右賢裨王十餘人衆男女萬五千人畜數十百萬見衛青傳吳郭成富春人夙著節義乘扁舟泛五湖以書劍自娛

黃武中徵拜武義校尉遷黃門侍郎封永興富春二縣侯

宋郭成德順人元豐中將涇原兵擊破夏人斬其將築平夏城渭帥章瓘擇成駐守進雄州防禦使輕財好施名震西鄙

元郭成亳州人年七十一母喪食粥廬墓十年朝夕哭臨人哀其老而能孝



同姓名錄卷五